



Heinrich Schmid ed il rumantsch grischun

Il «Quaderni grigionitaliani» sa regorda dal bab dal rg Heinrich Schmid (1921–1999).

2



Thiago cun il bike enturn il mund

Sin ses viadi cun bike enturn il mund ha il mat brasilian Thiago (24) era visità il Grischun.

10

südostschweiz

LA QUOTIDIANA

Redacziun: Via Sommerau 32, 7007 Cuirra, tel. 081 255 57 10, redacziun@laquotidiana.ch

Ils sonchs da glatsch sun rivats

■ (anr/afi) Pancraz, Servaz, Bonifaz e la Sofia as preschaintan ingon cun ora variabla e temperaturas fraidas. Plü bod gniva semnà e miss üert pür davo il di da la «Sofia fraida». Ushè gniva evità cha las dschetas faivan ir in malura la semnada. Dürant ils ultims ons sun gnüdas fattas diversas masüraziuns a regard las dschetas d'ürant il mais da mai. Ils resultats demuossan cha dü-

rant ils quatters dis dals sonchs da glatsch nu saja daplü dschetas co uschigliö d'ürant il rest dal mais. Il giardinier *Schimun Neuhäusler* da Scuol cussaglia da metter üert pür vers la fin dal mais mai, dimena fin cha la terra es ün pa plü choda. Cün quista masüra as poja spagnar blera lavur.

> PAGINA 11

Sainza diminuir il personal

■ (anr/fa) I'ls ultims ons s'han diminuidas las transacziuns al fanestrigl da la sedia regiunala da la Banca Chantunala Grischuna a Scuol. Cün novas sportas ha la BCG reagì als bsögns da la clientela chi regla ils affars bancars adüna plü suvent via internet. «Illas filialas da la banca vegnan ils cliants impustüt per cussagliaziuns persunalas», ha dit *Richard à Porta*, il

manader da la regiun Scuol, «quella cussagliaziun individuala survegna els uossa qua illas novas localitats aposta per quel serv.» Sco cha l'impiegada *Maja Andry* ha constatà «s'haja badà fingià il prüm di chi'd es fich agreabel per cliant e cusgliadra chi s'es in ün ambient discret e s'ha temp e quietezza».

> PAGINA 11



Cilgia Rest e Maja Andry pro'l bancomat multifunziunal sper ün dals locals da cussagliaziun e'l chantun pels uffants.

FOTO F. ANDRY

Tgitar il contact

■ (anr/ac) Quater fatschentas indigenas han envidau la sonda vargada ad in'exposiziun da primavera el tertretg dalla scola veglia a Trun. Sut l'enzenna «regiunal ei genial» han ils interpretenders *Roland Albin*, *Sascha Decurtins*, *Marcus Michel* ed *Andi Monn*, tuts quater derivonts da Trun, envidau la clientela per

presentar ils pli novs products da lur fatschentas e far attent alla purschida indigena. Il contact personal cun la clientela valetschan ils possessurs da fatschenta per impurtont ed els vesan in cert potenzial da sepresentar communalmeins.

> PAGINA 5

Sawiris e Weber dattan la direcziun

Preparativas per ina collaboraziun el marketing turistic d'Andermatt, Sedrun e Mustér

DA HANS HUONDER / ANR

■ Igl atun vargau ei la **Andermatt-Sedrun-Disentis Marketing SA** vegnida fundada. La finamira: In marketing turistic comunabel dall'entira regiun da Mustér entochen Ursera. Il mument ein las duas societads da pendicularas activas en quella societad che s'auda per duas tiarzas a *Samih Sawiris* e per ina tiarza a *Marcus Weber*. Gia igl atun han ils responsabels dau d'entellir ch'ulteriurs partenaris seigien beinvegni. Cün quels han els manegiau las organizaziuns da turissem da mintga vart dall'Alpsu, respectivamein las vischnauncas. Ussa para ei da vegnir moviment concret en quella causa. «La suprastanza da Sedrun Mustér Turissem ei aviarta per las discussiuns», di *Silvio Schmid* che tgamuna l'organizaziun entochen la proxima radunanza generala s'enter la demisiun da *Corinne Staub*. Ina schanza da nezegiar las sinergias sil sector dil marketing vesa era il meinafatschenta d'Andermatt Ursera Turissem, *Edwin Holzer*.



La colligiaziun dils territoris da skis d'Andermatt, Sedrun e Mustér ei fatga. Ussa duein ulteriurs pass el marketing comunabel suandar.

FOTO H. HUONDER

Ina buna collaboraziun structurada sin quei sector seigi inevitabla. Ina collaboraziun davart las organizaziuns da turissem – respectivamein las vischnauncas –

vegness realisada sin fundament da convengientschas da prestaziun, analog alla situaziun dad oz denter Sedrun Mustér Turissem e Grischun Vacanzas. En sesez in

pass logic s'enter la colligiaziun dils territoris da skis d'Andermatt entochen Mustér.

> PAGINA 3

Il militar vul ils chauns vid la corda

■ (rtr) Avant in mais ha l'armada decis: Sin l'areal dal Rossboden na dastgan chauns betg pli ir senza corda. Ina decisiun che na plascha betg a tuts. Il nov scumond sin l'areal dal Rossboden chaschuna discordanzas. Dapi in mais vala quest scumond. Dapi lura hai dà reclamaziuns da blers possessurs da chauns. Cünzunt sin la plattafurma facebook è vegni fatg attent sin il nov scumond. Las tavlas da scumond èn vegnidas tartagnadas. Il militar ha purtà plant cunter nunenconuschent. Er il president da la citad *Urs Marti* ha survegni reclamaziuns. El vul far insatge cunter il scumond. Tenor el na saja betg vegni communitgà a la citad davart il scumond. *Daniel Steiner*, cumandant dal plaz d'armas sin l'areal dal Rossboden, prentenda dentant ch'el haja communitgà quai gia sis mais avant. Uss vul Marti tshertgar il discurs cun l'armada. Per Steiner èsi dentant cler: vi dal scumond na sa mida nagut. Il scumond saja valaivel ed igl n'haja dà naginas reclamaziuns tar la publicaziun uffiziala.

Colurs, fuormas, figuras

Vernissascha dil project dalla Scolaviva Laax

■ (anr/abc) 180 affons ein sefatschentai a Laax e Falera durant varga dus meins cun otg canzuns e cun transponer quellas en maletgs, sculpturas, installaziuns ed autras fuormas d'art. Ils dus artists *Yvonne Gienal* e *Luis Coray*, da cuminonza culla squadra da scolastas e scolasts, han realisau quei grond project d'art per e cun affons. Els ein sefatschentai cun art e musica romontscha en diversas fuormas e dimensiuns.

Otg canzuns han inspirau mintga partiziun. Sco Coray ha declarau alla vernissascha ha el stuii surstar ch'ìls affons han luvrau meinsvart vid il project cantond la canzun da lur classa. Igl onn da scola current frequentan rodund 180 affons scola e scoletta a Laax. Igl entir menaschi, naven dallas scolettas e scola primara Laax e Falera sco era il scalem superior da Laax, Falera, Sagogn e Schluain, ei staus cumpigliaus ella cumbinaziun digl art fi-

gurativ e musica romontscha. La secunda part dalla vernissascha ei stada ella casa da cultura Cularta. Era leu ein las ovras da diversas classas exponidas. S'enter la vernissascha han ins caschun da visitar l'exposiziun ella Cularta ed ell'aula dalla casa da scola Grava tochen e cun vendergis, ils 24 da matg. Quella sera ei la finissascha festiva dil project.

> PAGINA 9



Ils objects d'art, creai cun tagliors da carn, fan allusiun alla canzun dil bau.

FOTO A. BEELI



9 771424 749004

Servetsch d'abunents e da distribuziun: tel. 0844 226 226 mail: abo@somedia.ch